

LE  
MANIFESTE  
DE  
MONSEIGNEVR  
LE PRINCE.

ADDRESSE AV ROY.

---

M. DC. XXIII.

Case

F

39

326

LE

MANIFESTE

1623m

DE

MONSIEUR LE PRINCE

DE PRINCE

MONSIEUR LE PRINCE

MONSIEUR LE PRINCE

*Le Manifeste de Monseigneur  
le Prince.*

**I**L n'y à rien dans ce bas Vniuers qui nous  
marque mieux le portraict de la Diuinité  
que nos Roys ses viues Images, & qui nous  
face voir de plus prez les effects de l'Eternel  
à l'endroict de ses creatures, que les actions  
de ses Oingts Sacrez, formées sur le model-  
le de ses commâdements irreuocables. Qui  
ne sçait? que quand les humains offensent  
la Diuine Maiesté de leur Createur, & qu'ils  
se portent à des choses vicieuses contre les  
les reigles de leur deuoir. Ce bon Dieu qui  
ne veut pas perdre ceux qu'il a racheprez  
par le précieux sang de son fils nostre Sei-  
gneur Iesus-Christ se sert d'un doux & pai-  
sible moyen, pour les attirer à la recognoi-  
sance de leurs fautes par sa grace preuenâte,  
les faisans r'entrer dans leur aneantissémēt:  
d'où s'ensuit leur conuersiō en l'estat d'une  
meilleure vie. Mais lors qu'au contraire leur  
obstination les fait perséuerer en leurs mes-  
chancetez, & qu'ils ne nettoient point par  
vn repentir de cœur les tasches qui noircis-  
sent le dedans de leurs consciences, & qu'ils  
se delectent à faire la guerre à l'Autheur de  
leur Estre, ce Dieu foudroyât, armé de cour-  
roux, assemble ses forces, & bat à outrance

les ennemys de sa gloire & de son nom , faisant ressentir à leurs ames les peines de l'enfer effroyable.

Ceux qui , comme bon François , auront les ames desueloppées des partialitez , & separees des seditions & reuoltes, & qui (comme Aigles) regarderont à plains yeux les rais du Soleil de la France. **L O V I S L E I V S T E XIII.** legitime successeur d'Henry le Grand, le Chef-d'œuvre du monde, & la merueille des Roys, verront qu'à l'exēple de Dieu il a usé enuers ses subiets rebelles d'une plus que misericordieuse misericorde , leur pardōnāt plusieurs fois leurs crimes & delits, & receuant à mercy ses ames seditieuses filles du desespoir, qui courent ya si long-rēps hastiuement à leur perte. Ce bon Roy, cet Hercules , dompteur des monstres, ce fils aîné de l'Eglise , ne s'est pas voulu seruir de premier abord de son autorité Royale pour se rendre absolu : car pour les attirer à repentance, il s'est contenté de sa voix, affin de faire r'entrer ces desobeissans dans le sētier d'où ils s'estoient fouruoyez : mais voyant que cette douceur estoit trop douce pour appriuoiser ces ames rudes, il a esté cōtrainct d'y employer celle de son Parlement lequel touchant les playes de ses vlceres , à retranché ses membres pourris , & endommagé par le reuolte du nombre de ses fidelles seruiteurs, les declarans criminels de leze Maiesté, & en fin ce debonnaire Prince con-



ſiderant que ces paralytiques eſtoient ſans reſſentiment, & que les Arreſts de ſa Cour de Parlement reſtoient inutiles, deſireux de conuertir ſes ſeditieux à la cognoiſſance de leurs crimes, il a employé la force de ſes armes pour conſeruer ſon authorité, & la marquer avec le fer, dans le cœur empierré de ſes mutins.

Or pour faire voir clairement (ainſi que dans vn miroër) à ceux qui comme bons François ont leurs poitrines fleur-delizees, le iuſte ſubiect qu'à eu noſtre Alcide de ſe porter à l'extreme, pour ruyner les deſſeins de ſes ennemis contraires à ſon ſeruice, & pour plus ayſement faire cognoiſtre ſa bonté, douceur, & miſericorde, & à l'opposite la malice, deſobeyſſance, & infidelité de ſes rebelles. Il faut remarquer qu'après que Henry le Grand d'heureuſe memoire, que Dieu abſolue, ſe fit faire place par l'effort de ſes armes au trauers de ſes ennemis, & ayant eu ſon front adonné du Diadème Royal, abandonnant la Pretendue Religion, pour ſuiure la Catholique, Apoſtolique, & Romaine, voulut (pour en quelque choſe recognoiſtre les ſeruices qu'aucuns Seigneurs de la Pretendue Religion luy auoient rendus, & leur oſter la deſſiance qu'ils auoient de ſa Royale humeur) leur confirmer le don de quatre vingts deux Villes que leur auoient fait les Roys ſes predeceſſeurs pour leur aſſurance, ſans conter vingt-

cinq autres qu'ils vsurpoient, & ont vsurpé  
 iufques à present d'une iniufte autorité, &  
 ce pour leur refmôigner qu'il vouloit les  
 faire viure en la liberté de leurs confciences,  
 fans les agitter en nulle forte. Ces Villes,  
 non des plus foibles: mais des plus fortes,  
 fcituees en tous les endroiçts de la France,  
 leur furent données par continuation par  
 l'immense bonté de ce Grand Monarque,  
 aux conditions qu'ils ne feroient dans icel-  
 les, n'y ailleurs aucunes aflemblees, Syno-  
 des, ny Cercles, que par l'exprez con-  
 fentement de fa Maiefté: & ce iufques à vn ter-  
 me limitté. Lequel expiré fut accompagné  
 d'un autre, par la fauorable faueur de ce  
 bon Roy, qui ne refufoit rien à fes fubieçts.  
 La mort déplorable duquel arriuant par le  
 coup d'un abominable parricide. Il fallut  
 que ces reformateurs vinffent recognoifre  
 ce nouueau roy LOVIS LE IUSTE, reiet-  
 ton de l'ancienne race de S. Louys, efleué  
 au throsne Royal, par le trespas regrettable  
 de cef Incomparable, & apres auoir rendu  
 à fa Maiefté l'hommage de leur obeyffance,  
 & le terme de la poffeffion de leurs villes  
 efcheu, ils impetrerent d'abondant de la  
 Royne mere Regente (qui tenoit de ce  
 temps-là en main le Gouuernement de l'E-  
 ftat, pour le bas âge de fon Fils) vn autre de-  
 lay, aux conditions prealleguees, & le tout  
 pour conferuer la Couronne en fon entier,  
 qui eftoit menacee de naufrage: ainfi ces

ames craintiues qui cherchoient de l'asseurance au milieu de la trāquilité, obtindrent de leurs maiestez aysement ce qu'ils demandoient, ven que le dessein de ces ames Royales estoit d'accōplir les Edicts & Ordonnances sur ce faictes par le Grand Henry.

C'est en ce lieu que ma plume s'arreste pour marquer du crayō de la verité dans les cœurs François, les peines & les souffrances que receut de ce temps de l'euenement du Roy à sa Couronne. Ceste magnanime Princeesse Marie de Medicis, femme & Mere des deux plus grands Roys de la Terre. n'est-il pas vray que l'Estat alloit panchant à sa ruyne, & la nef de la Frāce submergee dans les eaux d'un desbordement furieux, si cette Amazonne ne luy eust seruy de Pilotte, & qu'elle n'eust gauchy par sa preuoyance le heurt des ondes courroucees qui la menaçoient? ouy, c'est vne verité reconnue par toutes sortes de creatures.

Tant s'en faut que ses pretendus Religioneux ayent reconnu le bien que de tout temps ils ont receus de ses sacrees Maiestez: au cōtraire bannissans de leur cœur, l'honneur & le respect qu'ils doiuent a leur souverain Seigneur, pour y loger un mespris de son pouuoir, & abusans de son ieune âge, ne iugeant pas que Dieu est son tuteur, & qu'il le tient souz les ailles de sa protection, ils ont secoué le ioug de leur obeissance, donnant l'entree libre de leurs Villes aux pre-



miers mescontents qui les elizoient pour re-  
 fuge, & courans à bride abbatue apres leurs  
 desreiglezz mouuements, ont faict des Syno-  
 des & Assemblies contre les cōuentions fai-  
 ctes, tant par deffunt Henry le Grand, que  
 LOUIS LE IVSTE à present regnant. Ce  
 paisible Roy qui voit que ces suiets muti-  
 nez mesprisoient son autorité, leur pres-  
 criuit des Loix qu'ils ne voulurēt nō plus ob-  
 seruer que les anciennes. Le Bearn ne trou-  
 uoit pas bon qu'on professast dans son en-  
 clos la Religion, Catholique, Apostolique,  
 & Romaine, ny ne voulut non plus acqui-  
 cter les decimes, ny payer le reuenu aux  
 Euesques, & Prelats qui leur appartenoient,  
 dogmatifans en cela comme les Antropo-  
 morfittes, enuiron l'an quatre cens, qui en-  
 seignoiēt qu'il n'estoit loisible aux Euesques  
 de posseder des richesses, & que l'Eglise ne  
 peut auoir autre bien que les spirituels. Vui-  
 clef plus temeraire disoit, que les Princes se-  
 culiers deuoient non seulement: mais pou-  
 uoient enuahir ce qui est de l'Eglise, affin de  
 la chastier par les mesmes voyes, qu'elle  
 offence, doctrine abominable, contraire à  
 l'Escripture Saincte, aux Peres, & à la raison;  
 car il est escript en l'Exode chapitre 24. *Tu ne  
 tarderas de rendre les decimes, & payer les premices.*  
 Sainct Clement au liure des Constitutions  
 Apostoliques, chapitre 25. escript & pres-  
 cript ainsi. *Que l'Euesque en qualite d'homme de  
 Dieu, prenne les decimes & les premices: car elles*  
sont



*sont deuës selon le commandement de l'Eternel.*

Les Bearnois neantmoins ne vouloiēt rien faire de tout cela: mais ils y furent cōtraints, & forcez par la presence de Nostre Ieune Alexandre, qui à leur confusion enrichit ses armes victorieuses des despouilles de leur honte, ces desordres cessez & calmes en ce pais-là, le Roy reuint à Paris, où il ne fut si tost arriué, que cōmme d'un chef d'hydre couppé il en renaist d'autres, aussi apres ce desbordemēt assoupy, il en nasquit vn nouveau à la Rochelle, ville principale du gouuernement d'Aulnis differant en qualité: mais plus dommageable en essēce que l'autre, ou ils firēt vne assemblee contre le vouloir du Roy qui l'a leur auoit deffendue. Icy paroist la bonté infinie & clemence nonpareille de ce bon Prince, en ce qu'ayant sceu que ce Synode national de la generalité des Eglises Pretēdues Reformees s'estoit assemblé en ce lieu pour establir entr'eux vne Republique, & par ce moyen aneantir la Monarchie Françoisē. Sa Maieité despecha en diligence plusieurs fois des deputez vers eux pour leur faire rompre ceste conuocatiō prejudiciable à son autorité: mais ceste deffence leur seruit de Loy, pour les porter d'auantage à l'executiō de leur entreprise, en suite dequoy, apres vn nombre infiny de mespris des commandemens de sadite Maieité, les ayant faict declarer criminels de leze Maieité par son Parlement, & iugeant que, ou la douceur est inutile il y faut employer la

force, Le Roy ainsi offensé par ses suieſts, resolut d'y faire vn voyage, & ſuiuy de ſa martialle humeur, accompagné des Princes de ſon Sang, & des Chefs & Officiers de ſa Couronne, il fit marcher l'annee derniere le Regiment de ſes Gardes en campagne : d'un premier abord ſes deſſeins reuſſirent ſi bien, que Chaſtellerault : l'une des Villes des rebelles ouurit ſes portes à ſa Maieſté, & ne voulut point attendre l'effort de ſes armes, Saumur, Toüars, Loudun, Parthenay, Fontenay le Conte, Sainct Maixant, Nior, Taillebourg, La Gannache, Iarnac, & Beauuois ſur mer en firent le ſemblable : car les Gouverneurs de ces Villes zellez au ſeruiſe de leur Roy, ne voulurent point s'oppoſer à ſes intentiōs, cognoiſſant bien qu'il n'auoit dans ſa Royale poiſtrine que des deſirs ſallutaires pour la conſeruatiō de ſon Eſtat, & pour le proffitabile repos & tranquillité de la France.

Entre tant de Villes obeiſſantes, ſainct Iean ſe rebelle contre ſon Souuerain Seigneur, ſoit que la qualité du Chef qui y cōmandoit enflaſt le courage de ceux qui la gardoient, qu'ils eſperaffent vn fauorable ſecours de leur party, ou qu'ils creuſſent que les murs & ſoſſez de leur Ville fuſſent inacceſſible : comme ſi rien eſtoit impoſſible à la force d'une armee Royale, commandees par de ſi braues Chefs, & commandee de tant de membres aguerris, mais quoy ! ſes temeraires ne preueurēt pas le malheur qui

les talonnoit, & considererent encor moins, que comme les rais du Soleil peuuent dissiper en vn rien l'air nuageux qui veut offusquer la lumiere, que de mesme aussi la presence lumineuse, de l'auguste maiesté de ce magnanime peut destruire en vn momét les presomptueux desseings de ses ennemis. Briarree, & Ancellade, voulant faire la guerre contre Iupiter, firent des montagnes de terre pour escallader les Cieux, & le chasser de son throsne: mais se riant de leur folie, il terrassa les temeraires insensez d'un coup de foudre: aussi ces nouueaux geans, aduerlaires de Nostre Aleide, ont beau assembler Ossa sur Pelion pour amoindrir son autorité, il a fallu que leur temerité, impunie par la clemence de ce tout bon, demendast pardon, grace, & misericorde à sa maiesté. Il receut donc ce pauvre peuple rebelle à composition, se contentant pour marques de sa victoire de la ruyne des murs de saint Iean d'Angely, & de l'aneantissement de ces anciens Priuileges, aymant mieux se venger des choses insensibles, que des creatures sensitives, tant est courtois & debonnaire ce Genereux Prince, la prise de saint Iean, l'une des plus fortes places qu'eussent les rebelles, intimida beaucoup de courage, & fit que plusieurs autres Villes se rendirent en mesme temps à l'obeyssance de cét Inuincible Heros, à qui rien ne peut resister. Et si toutesfois Clerac Nerac, Bergerac, places rebelles, au lieu de faire profit du domma-



ge d'autrui, & se soubmettre aux Loix du deuoir, persisterent à mesmes effects que saint Iean, aussi receurent. ils pareilles aduantures, le Roy tousiours gaignant pays sur ces reuoltez, s'ornant le front de milles victoires, campa le siege deuant Montauban, l'une des plus importantes Villes de ce party rebelle. C'est là où ce Genereux Prince, sorty de la tige de l'Illustre Maison de Lorraine, Monsieur le Duc du Maine receut le coup de sa mort, lors que plus il estoit occupé à rendre au Roy les tesmoignages de sa fidelité à son seruice. Il ne faut pas demander si ces ames empestées receurent de la ioye de ce trespas, puis que c'estoit leur oster vne poignée d'espine du pied. A mesure que ces miserables se resiouyssoient de ceste fin funestre & dommageable. Toute la France la regrettoit, & peu s'en falut que le desplaisir que l'on en conceust ne causast vne grande effusion de sang de ces reste de reuolte, s'il n'y eust esté sagement pourueu par Monsieur le Duc de Montbazon, Gouverneur de Paris. Tant d'autres braues gens d'eslite se sont perdus deuant ceste ville desobeyssante, le receptacle de tout ce qu'il y a iamais eu de meschât icy bas que la memoire en est outrageuse. Nostre debonnaire Louys tesmoigna à la mort de ce Grand Duc, combien il ayme ses seruiteurs. L'hyuer venu & l'iniure du temps des fauorable pour vn siege de telle consequence, obligea le Roy à retirer son armée pour la loger es enuiros

de ceste trefniere à gens desesperez, & de se rendre à Paris où ses affaires l'appelloient. Il laissa en son absence en ce pais-la le grand Duc d'Angoulesme, qui sans fin à eu les armes sur le dos, & qui a donné de si belles preuues de sa valeur en tant de belles occasions, & par des victoires signallees contre les ennemis, pour s'opposer aux desseings du sieur de Rohan, chef de ce party rebelle, qui ont tousiours esté conuertis en fumee, rien ne pouuant resister à l'effort du genereux courage de ce grand Duc. Le roy donc de retour en la ville Capitalle de son royaume, y fit son entree triomphante, le bruiet de Vne le roy retentissoit iusques aux Cieux.

Il sembloit que ces ames mutines affoiblies par tant de pertes, surchargee de tant de peines, & accablee presque sous le faix de leur ruyne, pendant ce cours de l'hyuer ne deussent employer le temps à autre chose qu'à meditter les occasions d'attirer sur eux par leurs humbles submissions, la bienvueillance de leur Roy par eux si iniustement mesprisee. Tous les bons François viuoient en ceste esperance, & croyoient que comme c'est du propre de l'homme de pecher: mais du Diable, de persenerer que ces desuoyez recognoissoient leurs fautes: mais tout au rebours, car au lieu de songer à l'auantage de leurs consciences, ils minuttoient les moyens de faire reuiure leur sedition qui costoiøiet sa ruyne. Prenant donc pour fa-

ueur le commencement du prin-temps, & l'absence du Roy, ils font mettre en campagne au pays d'Aulnis le Sieur de Soubize, qui, depuis la prise de sainct Iean d'Angely, s'estoit, comme le limaçon, tousiours retiré en sa quoquille. Ce chef sans conduite, parjurant sa foy, & violant le seruice que de nouueau il auoit iuré à sa maiesté, fit leuee de toutes sortes de troupes, extraictes de la lye du peuple, & ayant assemblé quelque quatre à cinq mil hommes de pied, & cinq à six cens cheuaux, employe les premiers effects de sa rage à s'emparer de quelques places sans resistance, endommager le pays, violer femmes & filles, piller & saccager le pauvre peuple. Voila les beaux commencements de sa valeur.

Nostre Iuste Louis ennemy de telles inhumanitez, ne pouuant voir à ses yeux commettre tant de rauages par vn suiet pariure, sans y donner ordie, resolut de s'opposer à ces exactions pernicieuses par les armes, & s'achemina à grandes iournees vers ce pauvre pays desolé, pour dissiper, comme le Soleil par ses rayons les nuages qui vouloient obscurcir son esclat. Des-jà le sieur Comte de la Roche-foucault, Gouverneur pour sa maiesté en la Prouince de Poictou, contrarioit & empeschoit les desseings de ce nouueau partisan de reuolte, quand le Roy l'ayant ioinct, & estant arriué à Nantes, s'adit maiesté eut aduis que cét ennemy apprehendant les approches de ce Conquerant,



quittoit le pays pour preuenir le chastiment qu'il auoit merit , & qu'il ne pouuoit euitter que par vne honteuse fuitte, &   l'instant ce Grand Roy poursuiuit hastiuement en personne le sieur de Soubize qui s'estoit ia retir  dans l'Isle de Ri , qui est comme inaccessible, pour plus aysement faire embarquer son armee, & luy donner retraite dans la Rochelle, azille des ennemis de ceste monarchie Fran oise, mais ce Roy triomphant, ce mars belliqueux,   qui rien n'est impossible ny difficile, pour l'accomplissement de ses victoires, tant Dieul'aime & le fauorise, fit par sa seule presence retirer dans les abysses des eaux qui luy donner t passage, &   son armee au milieu de son Element, qui auoit tousiours, & de memoire d'honneur, remply son li t d'une si grande abondance de sa mou tte liqueur que aucun endroi t de ceste Isle n'estoit gayable. Ce fut alors que l'armee ennemie fut deffai te, & son Chef honteusement redu t par sa fuitte,   esuiter les coups de la collere de ce victorieux.

Cen'est pas mon dessein de d'escire le carnage qui fut fa t de ses temeraires brauaches, de plus do tes plumes que la mienne en ont fa t vne ample recit, il me suffira seulement de dire en passant, que ce qui ne fut sacrifi    la collere de ce vainqueur, furent ceux   qui la clemence plus qu'humaine de ce bon Roy, donna la vie, aymant mieux vaincre sans faire mourir, que de d -

ner la mort en combattant, la perte & de  
 faite de tant de creatures, que la liberté de  
 viure auoit attiré à ce party, ne debuoir-elle  
 pas faire ranger au deuoir de l'obeyssance  
 Royale ces perturbateurs du repos public?  
 Mais tant s'en faut: car ces miserables ob-  
 stinez à leur ruyne se saisirent de Royan, &  
 y assassinerēt celuy qui y commandoit, pen-  
 sant contester le passage à sa Maiesté, qui se  
 faict faire iour au trauers de leurs opposi-  
 tions, Tonnins se fit battre plus viollem-  
 ment qu'auparauant, effects de desesperer:  
 mais en fin ne l'vne ne l'autre n'ont peu es-  
 uiter leur prise.

Après la reduction de ces deux Villes,  
 Clerac, qui auoit desia ressenly les effects  
 de la clemence de ce debonnaire Roy, par  
 le pardon qu'il decerna au crime de sa rebel-  
 lion, se mutināt vne seconde fois, & se ren-  
 dant ingratte à la cognoissance de tant de  
 grace qui luy auoit esté faicte, ouurit ses  
 portes aux mutins qui s'offrirēt à la deffen-  
 dre, des desseins desquels finirent à leur  
 nayssance: car s'estans inhumainement  
 assouuis du sang d'un des bons Peres Iesui-  
 stes, que cruellement ils occirent, & après  
 sa mort le traisherent par les ruës, pour les  
 auoir excitez preschant la parolle de Dieu,  
 à obeyr à leur Roy, furent incontinent as-  
 siegez & forcez à se rēdre, & leur ville bris-  
 lee, pour signe de leur perfidie, & cruauté  
 abominable.

Cet exemple qui deuoit faire trembler de  
 peur

pour tout le reste des seditieux , & les attirer à leur deuoir , ne gaigna rien sur ces ames acariastre, ile ne laisserent pas de se fortifier dans S. Antonin , & d'y attendre le choc : mais comme ils virent ne pouuoir euer le foudre de ce puissât Roy , qu'en se rangeant à l'abry de ses lauriers , ils se rendirent entre les bras de sa misericorde , tousiours ouuerts à qui les eslist pour azilles , tellement que ce triomphant , se contenta de faire pēdre quelques Confus Autheurs , & Ministre du reuolte , prenant le reste à compassion & à grace.

Ce procedé fut trop doux , pour les ames si desloyalles & meschantes , puis qu'abusans de cette trop excessiue debonnaireté , laquelle vzoit enuers eux plus de pardō que de punition , ils se ietterent dans Negrepellice , sans considerer le peril ou ils alloient se plonger.

Negrepellisse donc plus opiniastre , & endurcie à sa meschâceté que les autres Villes , resolut de creuer , ou de soustenir le siege.

Pauures desesperez ! vous ne preuoyez pas le malheur qui vous tallonne , & confidez encor moins que c'est directement s'opposer à Dieu , que de resister aux Roys ses viuantes Images.

Le cœur fermé à toutes sortes de bons desirs , & l'oreille sourde aux sommations qu'on leur fait de se rendre , ils ne veullent rien croire ny ouïr , ils mesprisent ces admonitions salutaires , tant pour leurs corps ,



que pour leurs ames, & en fin ayans quel-  
 que temps vainement resisté; ils furēt pris  
 d'assaut, & tous immolez a la Parque, par le  
 tranchant de l'espee des soldats animez, &  
 irritez d'auoir veu trop de temps resister ces  
 Pigmées. Heureuse deffaite, si elle eust ap-  
 pellé le reste de ces fouruoyez dans le che-  
 min de l'obeyssance.

Ces tristes euenemens qui debuoiēt im-  
 primer la crainte & la peur sur la face du re-  
 ste de ce party rebelle, ne r'abbatirent point  
 l'audace à ceux de Lunel: car insolemment  
 temeraires & audacieux, ils oserent bien  
 refuser l'entree de leurs portes à la Maiesté  
 Royale, Monsieur le Prince de Condé y  
 conduisoit son armee, & les força à se ren-  
 dre à composition, ils eussent esuité leur  
 mort, si ne viollans point leurs foy iuree,  
 ils n'eussent voulu r'entrer triomphants  
 d'où ils estoient sortis vaincus, mais ayant  
 rencontré en se retirant, quatre cens hom-  
 mes des leurs, qui estoient sortis d'Aiguemor-  
 te pour les secourir, & qui les encouragerent  
 de regagner ce qu'ils auoient perdu, se lais-  
 serent malheureusement deceuoir à leurs  
 persuations, & lors qu'ils voulurent en exe-  
 cuter le dessein, ce fut à l'heure qu'ils trou-  
 uerent leur cercueil par la charge que leur  
 fit l'armee Royale; receuans ainsi le salaire  
 de leurs demerites.

Tant de victoires remportees sur ces re-  
 belles, & tant de corps ionchez par terre, ont  
 bien debillité leurs courages, & affoibly

leur party : mais non en rien diminué leur meschanceté & diaboliques inuentions : car se voyans descheus de leurs pretensions , & priués du moyen de pouuoir subsister plus de temps à l'effort des armes Royalles & victorieuses , (fleau de telles sortes de gens.) Ils ont mieux aymé tanter des voyes extremes, appellant l'Estranger à leur secours ( & par ainsi mettre la France en danger de se perdre ) que non pas de se rendre souz le ioug de leur obeissance , & s'asubiettir aux douces loix de leur naturel & legitime Roy qui ne leur prescrit que des choses raisonnables.

Ames enragees! ennemis de vostre patrie, vous portez - vous bien à des extremitez si vicieuses ? N'avez-vous non plus de soing du lieu où vous auez pris naissance , & où vous auez esté esleuez, que de le vouloir exposer à l'insolence de son capital ennemy.

Pour paruir à leurs damnables fins, ils inuoquent à leur ayde le secours du Comte Mansfeld , & attirent à eux le Mareschal de Bouillon , pensans derechef faire reuiure leur diabolique fureur par de telles & illi-cites pratiques : mais Dieu, qui comme scrutateur des cœurs, void, & entend tout, four-nist à nostre Monarque (son fauory) allez de moyens pour y remedier.

Car le Roy, rendant general de son armée de Champagne, Mōsieur le Duc de Neuers, qui en est le Gouverneur, luy commanda de s'opposer à l'entrée de ce Comte, qui ne

demandant qu'a rauager, auolle par tou  
où il est demandé, son armée fauorisée pa  
ledict Duc de Bouillon, & fatiguée de se  
pertes passées, s'approchans de nos frontie  
res en est vigoureusement repoussée, & ne  
reconoissans que trop qu'il n'y a rien a gai  
gner parmy des ames si Françoises & coura  
geuses, commadées par vn si genereux Prin  
ce, s'est retirée a la confusion de ces factieux,  
qui n'ont point de respit de vie qu'en la pro  
pte reconnoissance de leurs faultes.

Sommieres se faisant sage aux despends  
de tant de Villes qui ont trouué leur ruyn  
dans leur rebellion, s'est rangée au vouloir  
de son Roy, pour esuiter les semblables pei  
nes qu'ont enduré ces ambitieux Titants,  
(germe de sedition.)

Montpellier ores assiegé, minutte sa perte  
par sa desobeyssance, & suit les mesmes ve  
stiges que ses deuancieres, sa resistance sera  
vaine, veu qu'il faut que tout cedde aux ar  
mes de Nostre Grand Louys Incomparable.

Sus, sus, armes à bas, Rebelles, ie voy mō  
grand Roy triomphant menacer vos chefs  
de tempestes, empeschez que sa patience,  
trop souuent indignée ne se conuertisse en  
fureur, il est prest de vous donner le chasti  
ment conuenable à vostre desobeyssance.  
Ses Canons foudroyans sont pointez, les  
picques herrissées, & l'espée en main pour  
enuoyer vos corps à la sepulture. Preuenez  
sa resolution par la reconnoissance de vos  
demerites: iettez vous aux pieds de la Maje-



sté de cét Alcide, & implorant sa clemence, demandez luy pardon, il ne refuse point ceux quil'inuoquent: car sans fin il reçoit à penitence les vrais repentans de leurs fautes, iouyſſez-donc de ce doux priuilege, ames indignes de tant de graces?

Quoy! voulez-vous (vsurpateurs de l'autorité de nos Roys) prescrire des reigles à ce Genereux Monarque, que tout le monde craint & honore, par sa Iustice & clemence. Comme le plus grand Roy de l'Vniuers; Tout fleschist au bruiet de ses armes, & vous mutins obstinez, voulés-vous le suppediter, & par vne presomptueuse ambition luy disputer son legitime heritage. Bon Dieu! quel pernicieux desseing, ne vous faictes-vous point sages aux despends d'autrui? Ne tirez vous point d'exemples des ruynes & desolations de tant de villes rebelles qui ont senty les traits de la collere de ce iuste Roys Persisterez-vous en vos iniquitez; vos cœurs ne receuront-ils point les marques & caracteres des Fleurs de Lys, Symbole de vostre Pretenduë Religion? Ha Canniballes & Lestrigons! vous ne vous païssez que de sang, ne pensant faire regner vostre vsurpation que par le diuorce. Rebelles vous vous seduisez en vos creances, & ne voyez pas que Dieu autheur de toutes choses abbaisse les orgueilleux, & rehaïsse les humbles. Ia desfia les cœurs des chefs de vostre faction se glacent, la deffaite & ruine en tiere du sieur de Soubize, ne vous faict elle point cognoi-

stre que l'Altitonnant du Ciel & de la Terre n'autorise point vostre iniuste party? Mais au contraire par des euenements contraires à vos esperances, ne veut-il pas attirer vos ames à la cognoissance de vos demerites, ne donne-on pas la gloire du gain d'une bataille à la supresme puissance de Dieu qui y preside, si ainsi est, comme il est indubitable, ne vous apparoit-il pas assez par tant d'exploicts genereux, commis par ce nompareil Alcide, que le Ciel est indigné contre vous, & qu'il n'espouse point vostre deffence. Hé, que ne reuenez-vous à vous mesmes? Que ne cessez vous d'orager la France par vostre tumulte? C'est folie de s'opposer au vouloir de Dieu. Autheurs de la mort de tant de grands Seigneurs, & braues Chefs, & d'un si grand nombre de Gentilshommes, & de courageux soldats tuez par vostre reuolte. Leur sang courageusement respadu pour le seruice de leur Roy, ne crie il pas vengeance deuant Dieu, tant de vesues, orphelins, & pupilles ne vous publiet-ils pas les meurtriers de leurs maris, & de leurs peres, ouïy, ouïy, c'est à vous qui causez tant de langueurs à qui le pauvre peuple affligé dōne le blasm e de ce desastre, *Vox populi, vox Dei*, confidez les assassins que vous auez fait de vos Chefs, pour doute qu'ils eussent l'ame Royale, vos crimes de leze Majesté, vos sacrileges & violemens, & vous vous repentirez bien tost de vos iniquitez, où vous aurez vne ame Luciferienne, quel

plus grand honneur ? quelle plus belle gloire, & quel plus doux cōtētement à vn peuple que de se voir en paix, obeyssant aux Loix de son Supérieur, rien n'est de plus agreable à Dieu que le tranquille repos de ses creatures. Tout le Ciel mesmes s'esioiust, & les Anges en chantent le *Gloria in excelsis*, où au contraire les ames damnées, & les Diables mesmes de l'enfer s'en affligent.

Que doit-il estre doncques maintenant en ces lieux de lumiere, & de tenebres. Helas n'est-il pas vray que le Ciel pleure de vostre infidellité, & l'enfer en rit, ouy, le Ciel s'afflige de voir tant de pauvres ames distinees par leur creation à estre Citoyens de ceste sainte Cité, se perdent par leur obstination & peruersité malheureuse, & au contraire l'enfer est content de voir mourir ces pauvres creatures en l'estat miserable de leur damnation, creatures dis-ie veritablement faictes la proye des demōs infernaux, voyez, voyez, cœurs empierrez, & empoisonnez de reuolte, quels mal heurs causent vostre impieté, tant d'Eglises ruynees, & tant d'hotels desmolis sont les marques de vos execrations, vous n'avez pas pardonné aux choses insensibles : car en prophanant le Christianisme, & foullant aux pieds la veneration des bien-heureux Saints, vous auez reduict en cendre leurs Images, tāt leur memoire vous est odieuse, Grand Dieu Eternel, dōnez la veuë à ses aueugles, aueuglez de leur iniuste conuoitise, r'appelés



dans le berçail de vostre Eglise ces desuoyez  
 de leur salut:imprimez leur dans le cœur le  
 respect, crainte, & obeissance qu'ils doib-  
 uent porter a leur Roy, vostre Image viuante  
 icy bas parmy nous, ne permettez pas tout,  
 bon & misericordieux, que leurs ames sui-  
 uent la ruyne de leurs corps, & que le diable  
 par ainsi triomphant de la perte de vos crea-  
 tures, rachepée par le precieux sang de vo-  
 stre Fils vnique, nostre seigneur Iesus Chr.  
 Et toy peuple mutiné, flechis au vouloir de  
 ton Prince, r'entre dans le chemin de ton  
 obeissance au seruice de sa Royale maiesté,  
 & attirant sur toy sa clemence, separe toy  
 des desseings contraire à ses resolutiōs. Re-  
 cognois la debonnaireté de ce bō Roy, qui  
 au lieu d'expier tes fautes par le sang, te faict  
 grace, sois luy autant fidelle a l'aduenir, que  
 tu as esté rebelle par le passé. Consacre tes  
 vœux a son seruice, & chasses hors de ton a-  
 me ce poison de reuolte qui l'endommage.  
 Ne bande plus tes desseings contre sa puis-  
 sance. Si tu as esté bon seruiteur de Henry le  
 Grand son Pere pendant sa vie, sois - le de  
 Louys le Iuste son fils durant la sienne. Qui  
 a aymé l'vn doit cherir l'autre.

O Grand & Incomparable Roy, puisse le  
 Ciel de plus en plus fauoriser le reste de vos  
 souhaits, au contentement de vos bons Frâ-  
 çois, à la conseruation de vostre gloire, & à  
 l'augmentation & accroissement de vostre  
 Estat.

F I N.